



Dato: 28. oktober 2024
Kontor: Nordatlantkontoret
Sagsbeh: Anders Bertelsen
Forman
Sagsnr.: 2020-00538
Dok.: 3313816

Missingiut

Kalaallit Nunaanni pinerluttulerinermik inatsit malillugu inissiisarfimmiitanut nakkutiginnittuusussanik toqqaasarneq pillugu nalunaarut

Kingullermik inatsimmik [nr. 411, 23. april 2024-meersumik allanngortinneqartoq], inatsimmik nalunaarut nr. 1187, 18. september 2023-meersoq naapertorlugu, Kalaallit Nunaannut pinerluttulerinermik inatsimmi § 163, imm. 3 malillugu, tulluuttut aalajangersarneqarput:

Kapitali 1

Nakkutiginnittuusussanik sulilersitsisarneq

§ 1. Kalaallit Nunaanni Politiit pisortaanerata, § 18 naapertorlugu, nakkutiginnittuusussanik ataqatigiissaarisumiit innersuussineq malillugu, pisariaqartitsineq naapertorlugu kommunimi oqartussaasunik ilaatitsilluni innersuussinermi atugassat, Kalaallit Nunaanni najugallit, aalajangersimasumik amerlassusillit nakkutiginnittuusussat sulilersissavai. Pinerluttunik isumaginnittoqarfimmi pisortaqarfik, Københavni Kalaallit Illuutaani innersuussineq malillugu Danmarkimi najugalinnik nakkutiginnittuusussanik aalajangersimasunik amerlassusilinnik sulilersitsissaaq.

Imm. 2. Nakkutiginnittuusussat suliffinnut inuttaqanngitsunut qinnuteqartut tusagassiorfitsigut, suliaqatigiit atuagassiaasigut imaluunniit allatigut inuit aalajangersimasut Nakkutiginnittuusussanik toqqaasatut immikkut piukkunnaatillit, imm. 3 naapertorlugu, ilanngutassiamik ilanngussinermik ilisimannilernissaannik qulakkeerinissamut tulluuttuni, allagarsiinikkut qaaqquneqartassapput.

Imm. 3. Inuit peqqinnissaqarfimmik-, isumaginnittoqarfimmik-aamma ilinniartitaanermik suliassaqarfimmut attuumassuteqartut ilaatillugit, suliap nassatarisaanik suliassanik naammassinnissinnaasutut naleqqunnerpaatut isigineqartut, qinnuteqartut akornanni

Slotsholmsgade 10
1216 København K.

T +45 7226 8400
F +45 3393 3510

www.justitsministeriet.dk
jm@jm.dk

nakkutiginnittuusussat sulilersinneqassapput. Sapinngisamik inuit kalaallisut qallunaatullu oqalussinnaasut sulilersinneqartassapput.

Imm. 4. Inuit, tarnikkut napparsimmavimmi imaluunniit napparsimmavimmi immikkoortortami, inunnik annertunerusumik tarnikkut innarluutilinnik il.il. paaqqinnittarfimmi atorfillit napparsimmavimmi imaluunniit immikkoortortami tassani imaluunniit paaqqinnittarfimmi il.il. tassani inunnik suliaqarlutik nakkutiginnittuusussat sulilersinneqaqqusaanngillat. Tamanna tarnikkut napparsimmavimmut pineqartumut imaluunniit immikkoortortaqqarfimmut imaluunniit pineqartumut paaqqinnittarfimmut il.il. allatut ingerlatsinermut imaluunniit pisortaqqarfimmut attuumassuteqartunut inunmut taamatuttaaq atuuppoq. Unnerluussisussaataasuni, politiini pinerluttunilluunniit isumaginnittoqqarfimmi atorfillit nakkutiginnittuusussat sulilersinneqaqqusaanngillat.

Imm. 5. Nakkutiginnittuusussat, politeeqarfimmit oqaaseqaammik pereernikkut, sulilersinneqassapput. Oqaaseqaat tunniutsinnagu, Politeeqarfiup allakkatigut akuersisoqareerneratigut Qitiusumik Pinerlussimasut Nalunaarsugaaffiannit, qinnuteqartoq pillugu paasissutissat pissarsiarissavai.

Imm. 6. Inuit Kalaallit Nunaanni nakkutiginnittuusussat sulilersinneqartut amerlassusissaat pisariaqartitsinermik nalileereernerup kingorna Kalaallit Nunaanni Politiini pisortaanermit aalajangerneqartassaaq. Inuit Danmarkimi nakkutiginnittuusussat sulilersussat amerlassusissaat, pisariaqartitsinermik nalileereernerup Pinerluttunik Isumaginnittoqqarfimmi Pisortaqqarfimmit aalajangerneqartassaaq.

§ 2. Kalaallit Nunaanni nakkutiginnittuusussat sulilersitaasimasut nalunaarsuutaannik Kalaallit Nunaanni Politiini pisortaaner suliaqassaaq. Nakkutiginnittuusussat sulilersitaasimasut Danmarkimi najugallit nalunaarsuutaannik Pinerluttunik Isumaginnittoqqarfik suliaqassaaq.

Imm. 2. Nakkutiginnittuusussat sulilersitaasimasut Danmarkimi najugallit nalunaarsuutaat Kalaallit Nunaanni Politiini pisortaanermit nassiunneqassapput.

Imm. 3. Nakkutiginnittuusussat sulilersinneqartut Kalaallit Nunaanni najugallit amerlassusiisa nalunaarsuutaanni allannguisoqarpat Kalaallit Nunaanni Politiit pisortaanerit nalunaarsuummik iluarsaatamik suliaqassaaq. Nakkutiginnittuusussat sulilersinneqartut Danmarkimi najugallit amerlassusiisa nalunaarsuutaanni allannguisoqarpat, Kalaallit Nunaanni Politiit pisortaanerannut nassiunneqartussamik, nalunaarsuummik iluarsaatamik Pinerluttunik Isumaginnittoqqarfik suliaqassaaq.

§ 3. Kalaallit Nunaanni Politiit Pisortaanerit, Kalaallit Nunaannut pinerluttulerinermik inatsimmi § 163, imm. 1 aamma 2 malillugit

nakkutiginnittuusussamik tunineqarsinnaatitaasunut inunnut
nalunaarsuutininik, qaammatit tamaasa suliaqartassaaq.

Kapitali 2

Nakkutiginnittuusussanik toqqaasarneq

§ 4. § 157 malillugu inuup pineqaatissinneqarnera imaluunniit Kalaallit Nunaannut pinerluttulerinermik inatsimmi § 161 malillugu tigummigallarneqartussanngorpat, Kalaallit Nunaannut pinerluttulerinermik inatsimmi § 163, imm. 1-i malillugu pineqartumut nakkutiginnittuusussamik eqqartuussivimmit toqqaasoqarsinnaavoq.

Imm. 2. Aammattaq Kalaallit Nunaannut pinerluttulerinermik inatsimmi § 163, imm. 2-mi piumasagaatit naammassineqarsimappata, eqqartuussivimmit pineqartumut nakkutiginnittuusussamik toqqaasoqassaaq.

Imm. 3. Sapinngisamik, pasisaasup, unnerluussaasup imaluunniit eqqartuunneqartup qaniginerpaasaa nakkutiginnittuusussatut toqqaarneqassaaq.

§ 5. Pasisamut imaluunniit unnerluussamut nakkutiginnittuusussamik toqqaanissaaq oqaluuserineqarsinnaasoq, politiinit nalilerneqarpat, sapinngisamik ima siusinaartigisumik toqqaarneqarsinnaasussaaq suliap ingerlanneqarnerani najuunnissamut periarfissaqarsinnaatillugu, apeqqut eqqartuussivimmut qaqinneqassaaq.

Imm. 2. Suliap passunneqarnerani nakkutiginnittuusussamik taamaattumik toqqaassunneqarsimanngitsumut eqqartuussaasumut nakkutiginnittuusussamik toqqaasoqassappat, pisariaqartitsisoqarnera naapertorlugu, eqqartuussut oqaatigineqareerpat, apeqqut politiinit eqqartuussivimmut eqqaasitsissutigineqassaaq. Eqqartuussaasoq Kalaallit Nunaanni inissinneqassappat, Kalaallit Nunaanni najugalimmik nakkutiginnittuusussamik toqqaassunneqassaaq. Eqqartuussaasoq Danmark-imi inissinneqassappat, Danmarkimi najugalimmik nakkutiginnittuusussamik toqqaassunneqassaaq.

Imm. 3. Suliap passunneqarnerani toqqaarneqarsimasumik, eqqartuussaasoq Kalaallit Nunaanneersumik nakkutiginnittuusussamik peqareersimappat Kalaallit Nunaannilu inissinneqartussaalluni, nakkutiginnittuusussap najugaqarfia peqquataalluni tamanna siunertamut akerliunnigippat, eqqartuussutip kingorna nakkutiginnittuusussaaq ingerlaannassaaq. Suliap sularineqarnerani toqqaarneqarsimasumik, eqqartuussaasoq Danmarkimeersumik nakkutiginnittuusussamik peqareersimappat Danmarkimilu inissinneqartussaalluni, eqqartuussutip kingorna nakkutiginnittuusussaaq ingerlaannassaaq.

Imm. 4. Inuk Danmarkimi inissinneqarnissamut eqqartuussaasoq pisortatigoortumik Kalaallit Nunaanni inissinneqarnissamut

nuunneqarpat, nakkutiginnittuusussamik nutaamik Kalaallit Nunaanni najugalimmik toqqaasoqassaaq. Inuk Kalaallit Nunaanni inissinneqarnissamut eqqartuussaasoq pisortatigoortumik Danmarkimi inissinneqarnissamut nuunneqarpat, nakkutiginnittuusussamik nutaamik Danmarkimi najugalimmik toqqaasoqassaaq.

§ 6. § 4, imm. 3 naapertorlugu, inummik nakkutiginnittuusussatut toqqarneqarsinnaasumik Eqqartuussivimmit ujaasinermut Politiit ikiuutissapput. Pasisaasoq, unnerluussaasoq imaluunniit eqqartuussaasoq, toqqaasoqartinnagu pineqartup toqqagassatut kissaatigisaanik, aalajangersimasumik inoqarnerseq aperineqassaaq.

Imm. 2. Pasisaasoq, unnerluussaasoq imaluunniit eqqartuussaasoq, nammineq inummik siunnersuuteqanngippat, qanigisaqanngippat imaluunniit pineqartut arlaannaalluunniit piumanngippat imaluunniit toqqagaanissamut tulluannippat, taamaattoq imm. 3-7 takujuk, nakkutiginnittuusussanut nalunaarsuiffimmiit Politiinit nakkutiginnittuusussaq innersuunneqassaaq.

Imm. 3. Eqqartuussaasoq Kalaallit Nunaanni inissinneqassappat, Kalaallit Nunaanni najugaqartoq, nakkutiginnittuusussaq taanna, nakkutiginnittuusussanut nalunaarsuivinni tullinnguuttoq, taamaattoq toqqaanermi nakkutiginnittuusussap najugaa kiisalu oqaatsit allallu pissutsit attuumassutillit eqqarsaatigalugit § 18 naapertorlugu, nakkutiginnittuusussanut ataqatigiissaarisumik tusarniaareernermi innersuunneqassaaq.

Imm. 4. Eqqartuussaasoq Danmarkimi inissinneqassappat, Danmarkimi najugaqartoq, nakkutiginnittuusussaq taanna, nakkutiginnittuusussanut nalunaarsuivinni tullinnguuttoq, taamaattoq toqqaanermi nakkutiginnittuusussap najugaa kiisalu oqaatsit allallu pissutsit attuumassutillit eqqarsaatigalugit, Københavnimi Kalaallit Illuutaannut tusarniaareernermi innersuunneqassaaq.

Imm. 5. Nakkutiginnittuusussap pineqartup suliffia assigisaaluunniit pissutigalugit, ilaatillugu assersuutigalugu pineqartumut inunnik isumaginnittoqarfimmi sullissisutut, pineqartup naleqquttumik taassuminngarpiaq pasisamik, unnerluutigisaasumik imaluunniit eqqartuussaasumik isumaginninnissaminut piukkunnassusianut nalornilersitsisunik pissutsinik atuuttoqarpat, nalunaarsuivimmi tulliuuttoq innersuunneqassaaq.

Imm. 6. Eqqartuussiviup innersuussinera sioqqullugu, pineqartoq nakkutiginnittuusussaq kiisalu pasisaasoq, unnerluussaasoq imaluunniit eqqartuussaasoq, innersuussinissaq eqqarsaatigineqartoq pillugu oqaaseqarnissamut periarfissinneqassapput. Aammattaaq assersuutigalugu aallaqqaneq, napparsimaneq assigisaannilluunniit peqqutilimmik nakkutiginnittuusussap akornguseqqaneqassannginnera politiinit qulakkeerneqassaaq. Tamatumunnga peqatigitillugu pasisaasup,

unnerluutigisaasup imaluunniit eqqartuussaasup kina illersuisorineraa pillugu politiinit nakkutiginnittuusussaq ilisimatinneqassaaq. Nakkutiginnittuusussatut toqqarneqarnissaatut eqqarsaatigineqartoq, nakkutiginnittuusussanut nalunaarsuivianni allassimanngippat, innersuussisoqartinnagu allaganngorlugu isumaqataanermut uppernarsaat malillugu Pinerluttunik Nalunaarsuivimmi taanna inuk pillugu paasissutissat pissarsiarineqassapput.

Imm. 7. Nakkutiginnittuusussaq nakkutiginnittuusussanut nalunaarsuiviit ilaanni nalunaarsugaasoq, allanut pasisaasunut, unnerluussaasunut imaluunniit eqqartuussaasunut toqqarneqareersimaguni toqqagaanissamut innersuunneqarnissi itigartitsissutigisinnaavaa.

§ 7. Pasisaasumiit, unnerluussaasumiit imaluunniit eqqartuussaasumiit nakkutiginnittuusussareersoq allamik taarserneqarnissaa pillugu noqqaassut, unnerluussisussaataasumut saqqummiunneqassaaq, taassuma sapinngisamik piaartumik, eqqartuussinertut siullertut suliamik eqqartuussisimasumut eqqartuussivimmut, apeqqut tunniunniassammagu.

Kapitali 3

Nakkutiginnittuusussap suliasai piginnaaffilu il.il.

§ 8. Nakkutiginnittuusussaq sapinngisamik pasisaasumik, unnerluussaasumik imaluunniit eqqartuussaasumik isumasioqateqarluni iliuuseqartassaaq.

§ 9. Kalaallit Nunaannut pinerluttulerinermik inatsimmi § 163, imm. 1-i matumani naapertorlugu, pinerluttulerinermik suliap passunneqarnerata nalaani toqqarneqartup nakkutiginnittuusussap, illersuisutut toqqarneqartoq peqatigalugu, pasisaasoq imaluunniit unnerluussaasoq suliap passunneqarnerata nalaani ikiussallugu, siullertut suliasaraa. Eqqartuussutip oqaatigineqarnerata kingorna Kalaallit Nunaannut pinerluttulerinermik inatsimmi § 163, imm. 2 malillugu eqqartuunneqartup qanoq issusianik ilisimatinneqartarnissani aammalu inissiisarfimmi imaluunniit parnaarussivimmi allanilu pineqaatissiivinni napparsimmavimmiinnera imaluunniit napparsimaviup immikkoortortaaniinnera pisariaqartumik sivisunerutinneqannginnissaanik isumassussallugu nakkutiginnittuusussap suliasaraa.

Imm. 2. Nakkutiginnittuusussap pasisaasoq, unnerluutigisaasoq imaluunniit eqqartuussaasoq Kalaallit Nunaannut pinerluttulerinermik inatsimmi §§ 159 aamma 162 malillugit naammagittaalliorfissat aammalu pineqaatissiinermik eqqartuussummik allanngueqqusinermit imaluunniit atorunnaarsitseqqusinermit periarfissat pillugit siunnersorlugulu ilitsersussavaa. Aammattaaq nakkutiginnittuusussap pineqartup

naammagittaalliutigisinnaasaanik ilusilersuinissamik aammalu pineqaatissiissutip allanngortinneqarnissaa imaluunniit - atorunnaarsinneqarnissaa pillugu qinnuteqaammik pineqartoq ikiussavaa kiisalu suliat tamakku passunnissaannik ikiussallugu.

§ 10. Nakkutiginnittuusussap toqqagaanerup kingorna sapinngisamik piaartumik pasisaasoq, unnerluutigisaasoq imaluunniit eqqartuussaasoq pulaassavaa taassuminngalu attaveqarfiginnittuassalluni. Pulaarnerup siulliup saniatigut pisariaqartitsineq naapertorlugu pisassaaq.

Imm. 2. Taamaattoq eqqartuussaasoq Danmarkimi inissinneqarpat, nakkutiginnittuusussap minnerpaamik qaammammut ataasiarlugu eqqartuussaasoq pulaartassavaa. Aammattaaq Kalaallit Nunaanni eqqartuunneqartup qanigisaminut iluarinartumik attaveqaqateqartarnissaanut nakkutiginnittuusussap eqqartuussaasoq ikiortassavaa eqqartuussaasullu inuuissiortarfii, ullorsiortarfii il.il. eqqumaffigalugit.

Imm. 3. Nakkutiginnittuusussap, killeqanngitsumik aamma akornngusersugaanngitsumik inuttut, allakkatigut aamma oqarasuaatikkut pineqartumik attaveqarnissaaq pisinnaatitaaffigaa. Taamaattoq, Kalaallit Nunaannut pinerluttulerinermik inatsimmi § 359, imm. 1, nr. 2, naqinneq c malillugu pasisaasoq imaluunniit unnerluussaasoq tiggummigallagaappat aammalu misissueqqissaarnermi eqqarsaatigisassat pingaarutillit pisariaqalersitsippata, politiinit aalajangigaasumik nakkutiginnittuusussaaq allakkanik- aamma pulaartarnermik nakkutilliinermik aalajangersakkanik killilersugaappat, tamanna atuutinngilaq. Tamatuminnga aalajangiisoqarpat, pasisaasup imaluunniit unnerluussaasup illersuisua ilisimatinneqassaaq, soorluttaaq Kalaallit Nunaannut eqqartuussisarnermik inatsimmi § 379 aamma 380-imi periaaseq malinneqassasoq.

§ 11. Pasisaasoq, unnerluutigisaasoq imaluunniit eqqartuussaasoq pillugu qaqugukkut eqqartuussisoqartarnissaa pillugu, ilaatillugu nakkutiginnittuusussamik nutaamik toqqaasoqarnissaa siunertaralugu eqqartuussisoqartarnissaanut, eqqartuussivimmit nakkutiginnittuusussaaq malinnaatinneqartassaaq.

Imm. 2. Misissueqqissaarnermi eqqarsaatigisassat nalinginnaasuunngitsumik tamatumunnga akerliunngippata, pasisaasoq, unnerluutigisaasoq imaluunniit eqqartuussaasoq pillugu eqqartuussutitut aamma aalajangiinernut allattorsimaffiit, noqqaassutiginnittoqarneratigut nakkutiginnittuusussamut tunniunneqartassapput. Pasisaasup, unnerluutigisaasup imaluunniit eqqartuussaasup inuttut pissutsit atugai aamma eqqarsartaatsikkut issusaa pillugit paasissutissat pissarsiarineqartut pasisaasup, unnerluutigisaasup imaluunniit eqqartuussaasup akuersilluni nalunaarutigippagu, aammattaaq qinnutigineqarnerisigut nakkutiginnittuusussamut tunniunneqartassapput.

Imm. 3. Toqqaanermut peqatigitillugu pasisaasup, unnerluutigisaasup

imaluunniit eqqartuussaasup inuit pillugit nalunaarsuivikkut najugaa aamma kingullertut sumiiffigisimasaa pillugit politiinit nakkutiginnittuusussaq ilisimatinneqassaaq. Tamatuma saniatigut nakkutiginnittuusussap qinnuteqarneratigut pasisaasup, unnerluutigisaasup imaluunniit eqqartuussaasup inunnut nalunaarsuivikkut najugaa kingullertigullu sumiiffia pillugit politiinit nakkutiginnittuusussaq ilisimatinneqassaaq.

§ 12. Eqqartuussiviit Qullersaannut tunniunniunneqartuni suliani, suliassat §§ 5, 6, aamma 11-imi politiinut suliassiissutigineqartut naammassinninnissamik peqqusissutip nalunaarutigineqarnissaata tungaanut, Naalagaaffiup Unnerluussisuata (Rigsadvokatip) isumagissavai.

§ 13. § 18 naapertorlugu nakkutiginnittuusussanut ataqatigiissaarisup, Kalaallit Nunaanni inissinneqartussatut eqqartuunneqartumut nakkutiginnittuusussatut toqqagaasumiit qinnuteqartoqarnera malillugu pisariaqartitsineq naapertorlugu nakkutiginnittuusussap pisinnaatitaaffii aamma pisussaaffii pillugit nakkutiginnittuusussaq ilisimatissavaa.

Imm. 2. København Kalaallit Illuutaanniit, Danmarkimi inissinneqartussatut eqqartuunneqartumut nakkutiginnittuusussatut toqqagaasumiit qinnuteqartoqarnera malillugu pisariaqartitsineq naapertorlugu nakkutiginnittuusussap pisinnaatitaaffii aamma pisussaaffii pillugit nakkutiginnittuusussamut ilisimatitsissutigineqassapput.

§ 14. Pasisaasup, unnerluutigisaasup imaluunniit eqqartuussaasup illersuisuata, nakkutiginnittuusussamiit qinnuteqartoqarneratigut, pisariaqartitsineq naapertorlugu aammalu Kalaallit Nunaanni eqqartuussisarneq pillugu inatsimmi aalajangersakkat kiisalu nalunaarummi matumani § 10, imm. 3, aamma § 11, imm. 2-mi aalajangersakkat eqqarsaatigalugit, suliaq pillugu nakkutiginnittuusussaq ilisimatissavaa.

§ 15. Napparsimmaviup imaluunniit napparsimmavimmi immikkoortortap, inissiisarfiup imaluunniit parnaarussiviup il.il., nakkutiginnittuusussamik toqqaavigineqarsimasumik, inummik tiguisup, pineqartup sumiiffimmiinnini aallartippagu, nakkutiginnittuusussaa piaarnerpaamik ilisimatissavaa.

Imm. 2. Napparsimmaviup imaluunniit napparsimmavimmi immikkoortortap, inissiisarfiup imaluunniit parnaarussiviup il.il., taamatuttaaq pineqartup sumiiffimmiinnerata naanerani, nakkutiginnittuusooq ilisimatissavaa.

§ 16. Napparsimmavimmi imaluunniit napparsimmavimmi immikkoortortami, inissiisarfimmi imaluunniit parnaarussivimmi il.il. sulisut, aammattaaq taassuma illersorneqarsinnaasumik suliainik isumaginninnissaanut pisariaqartunik paasissutissanik tamanik, nakkutiginnittuusussaq tunissavaat. Paasissutissaq, nakorsaassutsimik peqquteqartumik pasisaasumut, unnerluutigisaasumut imaluunniit eqqartuussaasumut tunniunneqanngitsut, nakkutiginnittuusumuttooq tunniunneqaqqusaanngilaq.

Imm. 2. Nakkutiginnittuusussaq, pineqartup toqqagaaffigisaa pasisaasoq, unnerluutigisaasoq imaluunniit eqqartuussaasoq pillugu pinngitsaaliissutinut allattaavimmi paasissutissanik.

Imm. 3. Aammattaaq pineqartoq tamakkununga periarfissaqarusuppat aammalu pineqartoq tamatumunnga nakkutiginnittuusussaq nalunaarsuiffiup imaanik takunnissinnaanissaanut akuersilluni nalunaarpat, pasisaasumut, unnerluutigisaasumut imaluunniit eqqartuussaasumut nalunaarsuiffiup imarisaanik, ilaatillugu iliuusissanut pilersaarummut, nakkutiginnittuusussaq ilisimannilersinnaatitaavoq.

§ 17. Nakkutiginnittuusussaq nipangiussisussaataavoq.

§ 18. Nalunaarutip matuma malitsigisaanik, suliassami aamma piginnaatitaaffimmi il.il. saniatigut Kalaallit Nunaanni najugalinnik nakkutiginnittuusussanik ilitsersuineranut aamma ilinniartitsineranut il.il. naleqqiullugu suliassanik isumaginnittussamik, nakkutiginnittuusussanut ataqatigiissaarisussamik Inatsiseqarnermut Ministeri toqqaaassaaq.

Kapitali 4

Nakkutiginnittuusussaaffiup qaangiunnera il.il.

§ 19. Eqqartuussineq Kalaallit Nunaanni pinerluttulerinermik inatsimmi §§ 157 aamma 161-i naapertorlugu inissiinermik taamaattumik periarfissiisumik, tarniluttunut napparsimmavimmi imaluunniit napparsimmaviup immikkoortortani, inunnut annertuumik tarnikkut innarluutilinnut il.il. paaqqinnittarfimmi imaluunniit parnaarussivimmi inissinneqarnissamat eqqartuussinermik kinguneqanngippat pasisaasumut imaluunniit unnerluutigisaasumut nakkutiginnittuusussatut toqqagaaneq, qaangiuttarpoq.

Imm. 2. Pineqaatissiisut atorunnaarsinneqaraangat, Kalaallit Nunaannut pinerluttulerinermik inatsimmi § 163, imm. 2 malillugu, eqqartuussaasumut nakkutiginnittuusussatut toqqagaaneq qaangiuttarpoq.

Imm. 3. Nakkutiginnittuusussaq toqqagaasoq allamik taarserneqaraangat, aammattaaq nakkutiginnittuusussatut toqqagaaneq qaangiuttarpoq.

Imm. 4. Nakkutiginnittuusussatut toqqagaaneq imm. 1-imi aamma 2-mi aalajangersakkat malillugit qaangiuppat, toqqagaanerup

qaangiunnerani piffissami aallartinneqarsimasunut naammagittaalliutitut atallugu nakkutiginnittuusussap pasisaasoq, unnerluutigisaasoq imaluunniit eqqartuussaasoq ikiussavaa.

§ 20. Nakkutiginnittuusussaq, nakkutiginnittuusussat nalunaarsuivianniit piiarneqarnissi qaqugukkulluunniit piumasaqaatigisinnaavaa.

Imm. 2. Nakkutiginnittuusussat nalunaarsuivianni allaqqasoq nakkutiginnittuusussaq, taamatut suliaqartarnej malillugu pisussaaffiit ingasattumik sumiginnarpagit imaluunniit allatut taamatut sulisinnaanermut tulluurtut isigineqarsinnaanngippat, taamatut sulisinnaanermiit arsaarneqassaaq. Taamatut arsaarinnittoqarpat, pineqartoq nakkutiginnittuusussat nalunaarsuivianniit piiarneqassaaq.

Imm. 3. Imm. 2 malillugu nakkutiginnittuusussatut sulisinnaanermik arsaarinnineq pillugu aalajangiineq, § 2 naapertorlugu, Kalaallit Nunaanni najugalinnut nakkutiginnittuusunut Kalaallit Nunaanni Politiit pisortaanerani aammalu nakkutiginnittuusunut Danmarkimi najugalinnut Pinerluttunik isumaginnittoqarfimmut Pisortaqarfimmit aalajangerneqartarpoq.

Imm. 4. Imm. 1-i imaluunniit imm. 2 malillugit nakkutiginnittuusussat nalunaarsuivianniit piiagaaneq, pineqartumik nutaanik toqqaasoqarsinnaajunnaarneranik malitseqarpoq. Aammattaaq toqqagaaqqaanneq pillugu apeqqut piaartumik unnerluussisussaataasumiit eqqartuussivimmut tunniunneqassamat, imm. 2 malillugu paaaneq, malitseqarpoq.

Imm. 5. Nakkutiginnittuusussat nalunaarsuivianni allassimanngitsut, nakkutiginnittuusussat, imm. 2-mi eqqaaneqartut piumasaqaatit taakkua iluanni, taamatut sulisinnaanermik arsaagaasinnaapput. Tamanna pillugu aalajangigassaaq, eqqartuussivimmit aalajangerneqassaaq.

Kapitali 5 *Aningaasarsiat*

§ 21. Pinerluttulerinermik suliap suliarineqarnerata nalaani pasisaasumut imaluunniit unnerluussaasumut toqqarneqarsimasumut Kalaallit Nunaanni najugalimmut, nakkutiginnittuusussat nalunaarsuivianni allattorsimasumut, ukiumut tunngaviusumik akissarsiatut 1.488 kr.-nik Kalaallit Nunaanni Politiini Pisortaaneg nakkutiginnittuusussamut akiliisassaaq.

Imm. 2. Kalaallit Nunaanni Politiini Pisortaaneg, eqqartuussaasumut toqqarneqarsimasumut Kalaallit Nunaanni najugalimmut, nakkutiginnittuusussat nalunaarsuivianni allattorsimasumut nakkutiginnittuusussamut ukiumut tunngaviusumik 1.984 kr.-nik akiliisassaaq. Aammattaaq eqqartuussut naapertorlugu eqqartuussaasoq inissinneqarsimatillugu qaammatit pingasukkaarlugit akissarsiatut 1.488 kr.-nik, akissarsiatut nakkutiginnittuusussamut Kalaallit Nunaanni Politiini Pisortaaneg akiliisassaaq.

Imm. 3. Kalaallit Nunaanni najugallit nakkutiginnittuusussat tamarmik, eqqartuussinernut peqataaffigisaminnut atatillugu, aammalu ukiumut tallimariarluni pulaarnissamik angalanissanut atatillugu, taamaattoq imaalillugu pulaarnissanut angalanernut assartuunneqarnermut aningaasartuutit, tunngaviusumik aningaasat annertussusiisigut ukiumut 12.000 kr,-inik qaangeeqqusaanngitsumik, angallanneqarnissamut naleqquttumik aammalu uppernarsaasigaasunik assartuunneqarnermut aningaasartuutitut akissarsiassaqtussaataapput. Pisuni immikkorluinnaq ittuni aningaasat annertussusissaannut eqqaaneqartunut killigititamik sanequtsinissamut Kalaallit Nunaanni Politiini Pisortaneq immikkut akuersissuteqarsinnaavoq. Unnuisariaqarnermik pisariaqartitsiffiusuni tamatumunnga atatillugu naalagaaffimmi atorfilinnut maleruagassat atuuttut malillugit, unnuinernut aamma nerisassanut aningaasartuutitut matussutissanik tunniussisoqartassaaq. Aningaasartuutitut eqqaaneqartunut matussusiissutissat piumallugit Kalaallit Nunaanni Politiini Pisortaanermut saaffiginninnikkut pisassaaq.

§ 22. Københavnimi Kalaallit Illuutaat, Danmarkimi najugalimmut nakkutiginnittuusussat nalunaarsuiffianni allattorsimasumut nakkutiginnittuusussamut aammalu eqqartuussaasimasumut toqqagaasumut tunngaviusumik aningaasat annertussusaannik ukiumoortumik 1.508 kr.-inik akiliisassaaq. Aammattaaq eqqartuussut naapertorlugu eqqartuussaasoq inissinneqarsimatillugu qaammatit pingasukkaarlugit akissarsiatut 1.697 kr.-nik, akissarsiatut nakkutiginnittuusussamut Københavnimi Kalaallit Illuutaat, akiliisassaaq.

Imm. 2. Aammattaaq imm. 1-imi eqqaaneqartut nakkutiginnittuusussat, naalagaaffimmi atorfilinnut maleruagassat atuuttut malillugit, eqqartuussinernut aamma sullitamik pulaarnermut atatillugu, angallanneqarnissamut aammalu pisariaqarfiani unnuinermut, aningaasartuutitut matussusiissutissanik pisussaataapput. Aammattaaq unnuinermi nerisaqarneq naalagaaffimmi atorfilinnut maleruagassat atuuttut malillugit matussuserneqartarpoq. Aningaasartuutunik eqqaaneqartunik matussusiisitsinissamut, Københavnimi Kalaallit Illuutaannut saaffiginninnikkut pissaaq.

Imm. 3. Nakkutiginnittuusussanut nalunaarsuiffimmi allassimannngitsut, Danmark-imi inissinneqarsimasumut eqqartuussaasumut toqqarneqarsimasut nakkutiginnittuusussat naalagaaffimmi atorfilinnut maleruagassat atuuttut malillugit, eqqartuussinerni peqataanernut atatillugu aamma ukiumut aqqaneq marloriarnerit tikillugit pulaarnissamik angalanissanut atatillugu, angallanneqarnermut aammalu pisariaqartillugu unnuinermut matussusiiffiqineqartussaataapput. Aammattaaq unnuinermi nerisaqarneq naalagaaffimmi atorfilinnut maleruagassat atuuttut malillugit matussuserneqartarpoq. Aningaasartuutunik eqqaaneqartunik matussusiisitsinissamut, København-imi Kalaallit Illuutaannut saaffiginninnikkut pissaaq.

Imm. 4. Akissarsiassanut pisinnaatitaaffik imaluunniit akissarsiassat annertussusaat pillugu isumaqatigiinngitsoqartillugu, tamanna pillugu, Københavnimi Kalaallit Illuutaanniit innersuussineq malillugu Pinerluttunik Isumaginnittoqarfimmut Pisortaqarfimmit aalajangiisoqassaaq.

§ 23. § 21, imm. 1 aamma 2, aamma § 22, imm. 1-imi eqqaaneqartut aningaasat annertussusaat, pulaarnernut, eqqartuussinernut, naammagittaalliornernut il.il., aammattaaq tamatuminnga suliaqarnermut, ilaatillugu oqarasuaammut aningaasartuutitut atatillugu aningaasartuutitut, nakkutiginnittuusussap sulineranut akissarsiassanik matussusiissutaapput.

Imm. 2. § 21, imm. 1-3-mi, eqqaaneqartut aningaasat annertussusaat (1. april 2016-imi tunngaviusumik aningaasat annertussusaat), Kalaallit Nunaannut aningaasanut inatsimmi, Kalaallit Nunaanni akinut- aamma akissarsianut naligitinneqartumut nalimmaasaanermut procentimik, ukiumoortumik nalimmassarneqartarput.

Imm. 3. § 22, imm. 1-imi, eqqaaneqartut aningaasat annertussusaat (1. april 2000-imi tunngaviusumik aningaasat annertussusaat) qaqugukkulluunniit atuuttumik nunap immikkoortuini atorfilinnut nalimmassaatitut procentimik ukiumoortumik nalimmassarneqartarput.

Imm. 4. Pisuni immikkorluinnaq ittuni, Kalaallit Nunaanni Politiini pisortaanerup, § 18 naapertorlugu nakkutiginnittuusussanut ataqatigiissaarisumiit innersuussut malillugu aamma Pinerluttunik Isumaginnittoqarfimmut Pisortaqarfimmit, Københavnimi Kalaallit Illuutaanniit innersuussineq malillugu, suliap annertussusaa eqqarsaatigalugu § 21, imm. 1 aamma 2, aamma § 22, imm. 1-imi eqqaaneqartut aningaasat annertussusaat qaffassinnaallugilluunniit appartissinnaavai.

Kapitali 6

Atuutilerfia il.il.

§ 24. Nalunaarut ulloq [...] atuutilersinneqassaaq.

Imm. 2. Taamatuttaa q nalunaarut, nalunaarutip atuutilersinneqarfiani toqqarneqartunut nakkutiginnittuusussanut atuuppoq.

Imm. 3. Kalaallit Nunaannut pinerluttulerinermik inatsit malillugu toqqarneqartut nakkutiginnittuusussat pillugit nalunaarut nr. 366, 19. april 2016-imeersoq, atorunnaarsinneqarpoq.

Jusititsministeriet, ulloq [...]

Peter Hummelgaard

/ [...]